

CONVENIO DE COLABORACIÓN ENTRE A AXENCIA TURISMO DE GALICIA E A REAL FEDERACIÓN GALEGA DE FÚTBOL PARA A PROMOCIÓN DO EVENTO DEPORTIVO FASE ASCENSO A SEGUNDA DIVISION NO MARCO DO XACOBEO 2021-22

MEMORIA XUSTIFICATIVA

O xerente de Turismo de Galicia

DECLARA:

Que esta Axencia Turismo de Galicia formalizou coa Real Federación Galega de Fútbol o instrumento convencional arriba referido por un período de vixencia que abrangue dende o día da súa sinatura ata o 31 de decembro de 2022.

Que o instrumento convencional ten como obxecto o establecemento das condicións para a colaboración entre a Axencia Turismo de Galicia e a Real Federación Galega de Fútbol para a celebración do playoff de ascenso de Primeira RFEF a segunda división.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

Primeiro.- A Axencia Turismo de Galicia ten como obxectivo impulsar, coordinar e xestionar a política autonómica en materia de turismo e, en especial, a promoción e a ordenación do turismo dentro da comunidade e a conservación e promoción dos Camiños de Santiago.

No artigo 9 dos Estatutos da Axencia Turismo de Galicia, aprobados polo Decreto 196/2012, do 27 de setembro, establécense entre as súas funcións ou competencias a dirección das actuacións relacionadas coa posta en valor cultural e turístico do Camiño de Santiago, a súa promoción, a xestión da imaxe corporativa do Xacobeo e da rede de albergues, e o mantemento e conservación dos camiños e a súa sinalización, así como calquera outra acción que redunde en beneficio do Camiño de Santiago.



Segundo.- A Real Federación Galega de Fútbol (FGF), constituída o día 14 de novembro de 1.909, con nova denominación Real Federación Galega de Fútbol (RFGF) mediante concesión da súa Maxestade o Rei e notificada pola credencial nº183/2017 outorgando o título de "Real", é unha entidade asociativa privada considerada de utilidade pública, sen ánimo de lucro, que se rexe pola Lei 3/2012, do 2 de abril, do Deporte de Galicia, polo Decreto 228/1994, do 14 de xullo, polo que se establecen normas reguladoras das federacións deportivas galegas, resolución do 8 de setembro de 2009, da Secretaría Xeral para o Deporte, pola que se ditan as Normas de bo goberno das federacións deportivas de Galicia e polas disposicións que se diten en desenvolvemento da mesma, polos seus Estatutos e Regulamentos, Bases e Normas de Competición e demais disposicións de orde interna que dite no exercicio das súas competencias, e con carácter supletorio polos Estatutos, Regulamentos e normas reguladoras da Real Federación Española de Fútbol (RFEF), no que sexan aplicables.

Dentro da súa actividade na Comunidade Autónoma de Galicia, ademais das funcións propias de promoción, goberno, administración, xestión e organización do fútbol, exercerá, baixo a organización e tutela da Secretaría Xeral para o Deporte da Xunta de Galicia, as seguintes competencias:

- a) A promoción e divulgación do deporte do fútbol en todas as súas facetas.
- b) Canalizar aos deportistas á práctica do fútbol mediante os oportunos cursos de iniciación, formación e perfeccionamento.
- c) Apoiar técnica e administrativamente a práctica do fútbol velando ante os organismos competentes polo apoio desta modalidade deportiva dentro de Galicia. Cualificar e organizar as actividades e competicións deportivas oficiais de ámbito autonómico galego.
- d) Exercer o control das subvencións que se asignen ás Asociacións e Entidades Deportivas nas condicións que fixe o órgano competente.
- e) Calquera outras que lle sexan atribuídas pola lexislación vixente ou que acorde no ámbito da súa competencia a Asemblea Xeral.

Terceiro.- A promoción de grandes eventos de todas as índoles: culturais, artísticos, deportivos, etc. que se desenvolvan dentro da Comunidade axudan a prestixiar o noso destino nacional e internacionalmente.



No ano 2020, no que se declarou o estado de alarma para a contención da propagación da infección causada polo SARS-COV-2, adoptáronse restricións de aforo e medidas de control como o rexistro previo dos asistentes, acceso mediante código QR persoal e toma de temperatura, co obxectivo de desenvolver os eventos nun entorno seguro.

A fase de ascenso de Primeira RFEF a Segunda División reunirá un total de oito equipos que se disputarán, mediante dúas roldas eliminatorias, dúas das catro prazas dispoñibles para subir a Segunda División. Os duelos serán a un único partido e neles haberá prórroga pero non penaltis, pasando de rolda o equipo que lograse unha mellor clasificación durante a tempada regular. A Primeira División RFEF é unha categoría de recente creación que contou na súa primeira edición con tres equipos galegos (RC Deportivo, Racing Club Ferrol e RC Celta "B"). E dado que os tres atópanse clasificados con serias opcións de disputar o playoff de ascenso, a Real Federación Galega de Fútbol apostou pola organización da cita en terras galegas.

Cuarto.- Con este proxecto a desenvolver entre a Axencia Turismo de Galicia e a Real Federación Galega de Fútbol a través do presente convenio de colaboración contribuírase á promoción e divulgación tanto do Xacobeo 21-22 como da cultura xacobeá, e porá en valor o destino turístico Galicia como destino turístico deportivo. O evento será un importante revulsivo económico para os sectores da hostalería e a restauración, xa que terá un importante impacto económico. Así mesmo, dadas as específicas características desta entidade, a Real Federación Galega de Fútbol é a única capaz de desenvolver o obxecto deste convenio, razóns polas que non é posible subscribir un convenio con ningunha outra entidade.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se transpóñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, ou doutro instrumento alleo á natureza estritamente convencional.



En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

